

NO. SOALAN: 16

**PEMBERITAHUAN PERTANYAAN
MESYUARAT KEDUA, PENGGAL KETIGA
PARLIMEN KETIGA BELAS
DEWAN RAKYAT**

PERTANYAAN : LISAN

**DARIPADA : YB DATUK MOHD IDRIS BIN JUSI
[BATU PAHAT]**

TARIKH : 21 MEI 2015 (KHAMIS)

SOALAN :

Datuk Mohd Idris Bin Jusi [Batu Pahat] minta PERDANA MENTERI menyatakan langkah-langkah konkret memanfaatkan wang zakat sebagai penyelesaian masalah kemiskinan dan pengangguran, serta masalah sosial yang lain akibat daripada masalah tersebut di kalangan rakyat.

JAWAPAN: YB MEJAR JENERAL DATO' SERI JAMIL KHIR BIN HAJI BAHAROM (B), MENTERI DI JABATAN PERDANA MENTERI

Tuan Yang di-Pertua,

Sebagaimana Ahli Yang Berhormat sedia maklum, di bawah Butiran 1, Senarai 2, Jadual Kesembilan, Perlembagaan Persekutuan, hal-ehwal Agama Islam termasuklah urusan zakat terletak di bawah bidang kuasa Kerajaan Negeri. Mekanisme agihan zakat di setiap negeri dikendalikan sepenuhnya oleh pihak berkuasa agama masing-masing dan di luar bidang kuasa Kerajaan Persekutuan.

Saya suka mengambil contoh, pelaksanaan aktiviti agihan zakat oleh Majlis Agama Islam Wilayah Persekutuan (MAIWP) yang diletakkan di

bawah tanggungjawab kerajaan Persekutuan. Dalam memanfaatkan dana zakat, MAIWP telah merangka skim-skim bantuan zakat di mana sehingga kini terdapat sebanyak 32 skim bantuan zakat yang ditawarkan.

Dalam konteks untuk membantu mengurangkan masalah kemiskinan, MAIWP telah melaksanakan beberapa langkah seperti berikut:

- a) Menyediakan Skim Bantuan Kewangan Bulanan untuk membantu asnaf fakir, miskin dan muallaf. Menerusi bantuan ini, kekurangan keperluan bulanan mereka akan ditampung oleh bantuan ini. Dari masa ke semasa, MAIWP sentiasa mengkaji kadar bantuan yang diberikan menerusi skim-skim bantuan ini bagi memastikan ia kekal relevan dengan keperluan semasa. Sebagai contoh, kadar maksimum Bantuan Kewangan Bulanan telah dinaikkan daripada RM500 pada tahun 2013 kepada RM700 pada tahun 2014.
- b) Menawarkan bantuan-bantuan zakat bagi pembangunan akademik kepada mereka daripada keluarga fakir dan miskin. Sehingga kini terdapat sebanyak 9 skim bantuan zakat di bawah kategori pembangunan akademik meliputi bantuan di peringkat sekolah hingga pengajian tinggi. Dengan bantuan ini, masalah keciciran di kalangan anak-anak keluarga fakir dan miskin dapat dikurangkan.
- c) Menubuhkan institusi-institusi pendidikan dengan tumpuan kepada anak-anak daripada keluarga fakir dan miskin. Antaranya:
 - i. menubuhkan Institut Kemahiran Baitulmal (IKB) yang menyediakan kursus-kursus kemahiran diiktiraf oleh kerajaan. Dimana setiap peserta diberi elauan bulanan dan

- kos pengajian ditanggung sepenuhnya oleh MAIWP. Kursus-kursus yang disediakan adalah Kejuruteraan Elektrik, Perkhidmatan dan Penyajian Makanan, Rekaan Fesyen dan Pembuatan Pakaian, Seni Lukis & Seni Reka dan Teknologi Binaan Bangunan; dan
- ii. menubuhan dua buah sekolah menengah iaitu Sekolah Menengah Agama MAIWP dan Sekolah Menengah Integrasi Sains Tahfiz. Dua buah institusi pengajian tinggi juga telah ditubuhkan iaitu Institut Profesional Baitulmal (IPB) dan Kolej Antarabangsa Sains Perubatan PUSRAWI (PICOMS).
- d) Menawarkan bantuan zakat untuk asnaf fakir dan miskin berdikari iaitu menerusi penyaluran bantuan pembangunan ekonomi seperti Bantuan Perniagaan, Bantuan Pertanian, Bantuan Deposit Sewa Beli Teksi dan sebagainya.

Melalui bantuan-bantuan zakat tersebut, khususnya di bawah program pembangunan akademik dan memberi pendidikan kepada keluarga asnaf menerusi institusi yang ditubuhkan, adalah diharapkan mereka akan dapat membantu meningkatkan taraf hidup keluarga dan akhirnya keluar daripada belenggu kemiskinan.

Berhubung bagi mengurangkan masalah sosial pula, dana zakat turut digunakan oleh MAIWP menerusi pendekatan dakwah. Ia dilaksanakan dengan penyaluran dana zakat kepada agensi seperti Jabatan Agama Islam Wilayah Persekutuan (JAWI) dan pertubuhan bukan Kerajaan (NGO) untuk pelaksanaan aktiviti dakwah kepada pelbagai kelompok yang terlibat dalam gejala sosial.

Sekian, terima kasih.